

天一閣藏明代方志選刊

天一閣藏明代方志選刊

新昌縣志

天一閣藏明代方志選刊（一九）

定價十四元二角

上海古籍書店影印

上海福州路四二四號

一九八一年十二月重印

一九六四年六月上海古籍
書店據寧波天一閣藏明萬
曆刻本景印原書版框高一
九·二公分寬一四·四公分

重脩新昌縣志序

古云域中有三權而史居其一任豈輕哉
我

國家既內設館閣諸職以當古史官之任制
稱備矣而輿圖廣莫事物侈繁焉能周紀
而悉傳之故郡邑有志蓋以翼而輔焉也
至歲月彌積事與俱增或前志有闕於後
有缺故近數十年遠百年必更緝而附益

之亦宜也已屬邑新昌令田君 奉

監司檄重脩邑志付之梓矣而持之以請
序於予予觀二呂公與田君俱有文以冠
諸首既辨而博矣予言不幾於贅乎然予
嘗謂觀史者如入山海之藏隨人所欲得
而償焉二呂公新產也宜其專於邑之先
賢以爲茲邑重而予職忝守土則更有概
焉而不專於是者矣夫今古所謂循吏者

必曰美其俗平其賦安其民而使戶日以
滋田日以闢教日以興耳今覽茲俗之陋
而趨於偷也何能易而返之使淳乎賦役
之近煩而或病吾民也何能省而寬之以
蘇其困乎人材之衆也日登於用矣何能
作而成之與古之賢哲者侔而充

王家之實材也乎物產之夥也今若耗矣
何能使珠復於浦乳還於石乎生齒之日

益也籍宜有加矣而猶故焉其或不能悉拊而休養之使窮巖絕涯有不盡被吾

君之澤而瘁以瘠者乎前之官於此而有德於民者既尸而祝之載而傳之不朽矣吾其則法焉以追其烈於今乎昔鄉之稱為賢者其品列而其名佳矣其更表而樹之風焉使今之人繼其武而興焉以趾之者衆乎其他官司之廢置城市之規畫又

安能詳物其宜而一一以協之理乎仰思
前朝豪雋宦跡之所歷既覽其山川之形
勝景物之奇幻則必作之亭榭樓觀以爲
登臨嘯傲之所與其地之賢僚屬賓客之
選相與以攄幽發粹乎此而又紀之於文
以載其一時之盛其致誠美矣以予之拙
也不敢希慕乎古而今之時亦稍與古異
亦安能倣視之嬾於前人之致耶故所謂

五馬石城天姥水瀟諸勝無由至焉與沃
洲望松羣公遊遨其間徒神馳焉已唯以
前之所思者爲吾守令者職尤懼不克至
乎爾而田君同是職者也故書之以與田
君等相率勉而企焉

皇明萬曆己卯夏六月

賜進士第中順大夫知紹興府事錫山賈應

璧撰

重修新昌縣志叙

余讀漢班氏地理志本春秋列國叙其分野區域山川風物賢材至魯而獨詳蓋周公魯公之化於其國久吾夫子洙泗之教洋溢乎國中故其民好學上禮義迨漢數百年未泯也夫魯於齊晉其爲國小而其俗美故曰齊一變至於魯魯一變至於道後之學士觀於是而樂學尚友之思油然而

而興矣吾新昌邑於台剡之間不能數十
里其地瘠其民儉其財賦不足以當上邑
之什二獨其俗淳厚先民之流風善教猶
有存焉故於東南爲望邑舊志作於成化
間叙述雖詳詞乏體要且百有餘年矣今
田侯政事暇日取是舊本諮于羣彥質諸
大宗伯學士潘公輯而約之曰建置曰區
域曰山川曰風俗曰物產曰民賦曰學校

曰官師曰名宦曰選舉曰鄉賢曰女德曰
雜傳而鄉賢尤慎鄉賢曰理學曰德業曰
忠節曰孝友曰義行曰廉介曰政績曰教
澤曰文學曰武功曰隱逸曰遺英曰耆德
曰封廕而理學尤慎夫理學前志所未名
而名自今始猶夫漢唐歷代諸史未嘗以
道學立傳以道學立傳自宋始也夫貞元
間值而理學興焉一代不常有也况一鄉

耶吾鄉自宋石先生宗昭講業于龜山楊
先生得伊洛之傳而黃先生度石先生斗
文石先生塾游於晦翁朱子與之論道談
經顯諸康濟俞先生浙遠稽墜緒著述尤
章余先祖南康公冲之與兄聲之同師止
齋陳先生而習於水心葉先生據德游藝
炳焉與先哲同風漸涵後儒其孫秉南以
循政王先生夢龍以忠亮王先生爚以相

業陳先生非熊以貞烈文武徽聲並著當
世元竇天紀九十餘年賢者避世潘先生
音以草廬吳氏之學與其門人弟子翩翩
高蹈以待天下之清及我朝

聖作物覩俊乂咸登我小齋先生升以節孝
山龔先生不用何先生友諒以名教章先
生文華潘先生孔聲徐先生志文以文學
楊先生信民耻齋先生昌以風猷何先生

鑑俞先生欽小齋先生之孫獻斌斌奕奕
希世聲明皆本諸學問而董先生茂醇宿
儒篤論克紹前聞洵與潘宗伯皆從受業
焉蓋黃石諸君子之澤遠矣吾田侯之志
而詳之也皆以示教也且侯之治吾縣恭
儉廉循三載如一日有身教焉其爲志也
公而晰典而要直而理辨而溫詳而不渝
確而不固文而不靡不啻志之善也吾黨

之士觀於是樂學尚友之思其亦油然而興矣易曰君子教思無窮余於是亦云

皇明萬曆己卯初夏之吉

賜進士第資政大夫南京工部尚書前兵部尚書兼都察院右都御史邑人呂光洵撰

